

Date – 03/10/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Larsap Pu Indra Sena Reddy Nallu in Mizorama tuialhthei, buhfai leh Gas a hnianghnar theih nan thawktute theihtawp chhuah zel turin a chah.**
- 2. Chief Minister Pu Lalduhoma kaihhruai vawiina Council of Minister thukhawm chuan Sawrkar hnathawk Dearness Allowance 4% a tihpun an pawm.**
- 3. Prime Minister Narendra Modia radio programme Mann Ki Baat chuan vawiin khan kum 10 a tling.**
- 4. Haryana Assembly inthlan campaign chu vawiin tlai khan a tawp.**

<><><>

GOVERNOR

Larsap Pu Indra Sena Reddy Nallu chuan vawiin khan Raj Bhavan Mini Conference Hall-ah Food Civil Supplies & Consumers Affairs, Food Corporation of India (FCI) leh Indian Oil Corporation (IOC) hotute kawmin harsatna sukiang tura hmalak pui a inhuam thu a hrilh.

Thutkhawmah hian Larsap chuan sawrkar official atangin Oil, LPG leh buhfai-a Mizoram dinhmun, Mualkhang Bottling Plant leh Mizorama kudama awm zat leh buhfai chhekkhawl theih zat bakah Thla khata LPG mamawh zat leh dawn dan a zawt a, FCS&CA, FCI leh IOC Official te chu mipuiin Buhfai, Oil leh LPG a harsatna an tawh loh nan theihtawp chhuah zel turin a chah a ni.

Larsap chuan harsatna an neih chuan a hnena thlen hreh loh tura official te chu hrilhin, sawrkar laipui lama an hotute hnenah pawh an harsatna te thlensak a, an harsatna te sukiang tura theitawp chhuaha hmalakpui a inpeih reng thu a hrilh hlawm bawk a ni.

Tun dinhmunah hian FCI Godown-ah buhfai 13,000 Metric Tonne awm mekin, FCS& CA kudam ah 8659.33 Metric Tonne a awm mek bawk a. October quota sem tawh niin, November qouta pawh kar leh lawkah sem leh a ni tur thu FCS&CA official te chuan Larsap an hrilh a ni.

Larsap hian meeting zawhah Raj Bhavan kawtah Messua Ferrea (Herhse) tiak a phun a,

Vawiin vek khan Larsap chuan Sairang Rel station sak mek leh Lei (Mualkhang leh Sairang inkar) dawh mek a tlawh a, thawktute chuan nakum July thla ral hmaa Sairang Rel lei leh Sairang Rel station chu zawh hman an in beisei thu an lo hrilh a, Sairang Rel station-ah hian rel kawng (track) 13 a awm ang a, Passenger track 3 leh non- passenger track 10 a awm dawn a ni.

Sairang Rel station a tlawh zawhah Larsap hian Delhi a pan a, October ni 7 khian a lo let dawn a ni.

<><><>

SINLUNG HILLS COUNCIL

Mizoram State Election Commissioner Dr. H. Lalthlangliana'n kumin November ni 5 ah Sinlung Hills Council inthlanna neih a ni dawn a ti a, hemi ni vek hian vote chhiar ani dawn tih a sawi.

He thu hi vawiina thuthar thehdarhtute a kawmna ah sawiin Dr. H. Lalthlangliana chuan inthlan hun a puan atangin Model Code of Conduct hman tan nghal a ni a ti a, inthlanna muanawm leh felfai a awm theih nan

Party tin te leh sawrkar hnathawk bakah tlawmngai pawl leh mipuite thawhpuiah a sawm a ni.

Commissioner sawi danin inthlan chuh turte tan october ni 10 thleng thehluh theih a ni a, ni 14 thleng inhnuhdawh hun hawn niin November ni 5 ah vote thlak ani dawn a, hemi ni vek hian vote chhiar nghal tur niin postal ballot hman tur a ni a, inthlan that ngai a awm anih chuan November ni 6 ah neih tur ani tih a sawi.

Sinlung Hills Council term hi kumin November ni 21 ah a tawp dawn a, Aizawl District-ah Constituency 6 awmin Polling Station 19 zingah Critical Polling Station 6 a awm a, Kolasib District-ah Constituency 2 awmin Polling Station 7 a awm a, a vai hian Critical Polling station-a puan a ni a, Saitual District-ah Constituency 4 awmin Polling Station 12 a awm a, heng zingah hian Polling Station 3 te chu Critical Polling Station atana puan an ni bawk.

Sinlung Hills Council ah hian voter 23,789 an ni a, heng zinga 11,875 chu mipa niin, 11,914 chu hmeichhia an ni a, Constituency 12-a awm a ni.

<><><>

COUNCIL OF MINISTER

Chief Minister Pu Lalduhoma kaihhruai vawiina Council of Minister thukhawm chuan Sawrkar hnathawk Dearness Allowance 4% a tihpun an pawm.

Cabinet room-a thutkhawmah hian Agenda lut hrang hrang 5 te pawm a ni a, heng zingah hian Mizoram sawrkar hnathawk DA chu 4 percent-a tihpun niin hei hi sawrkar hnathawkten November thla atangin an hmang tan thei dawn a ni.

Agenda dang zingah The Mizoram Right to Information Rules, 2010 pawm a ni a, BPL te tan RTI zawhna zawh man zawng zawng a thlawn a ni tawh dawn a, Power & Electricity Department hnuai RDSS Scheme hnuai Smart Metre vuah tura ruahmanna chu pawm a ni bawk.

<><><>

NATIONAL WILDLIFE WEEK

Environment Forest and Climate Change Department changtu Minister Pu Lalthansanga chuan Kristian sakhaw vuan an nih avangin ramngaw leh nungcha humhalh kawngah mi tin te tan lak thar a pawimawh tih a sawi.

He thu hi vawiina India ram pum a nungcha humhalh hapta tum 70-na Aizawl-a Department buatsaih a hmanpuina ah sawiin Forest Minister chuan nungcha leh ramngaw chu mihringte tan an pawimawh hle a ti a, hmangaih an tul takzet tih sawiin nungchate chu mihringte nena chengho tura duan nilo mahse, mihringte nena inmamawh tawn an nih angin an chenna ramngaw ti chereu lova anmahni humhalhna kawngah tan lak zawk turin mi tin te tan la turin a duh tih a sawi.

Mizoram Principal Chief Conservator of Forest, Pu Ashok Kumar Biswal pawhin thusawiin Mizoram chu India rama ramngaw nei tha berte zinga mi a nih thu leh ramngaw leh nungchate chu India ram tan rohlu an ni a ti a, a humhalh kawngah theihtawp chhuah a ngaih thu sawiin boruak thianghlim leh tui thianghlim chu ramngaw atanga mihringten an hmuh thu leh nun nuam leh hlim taka mihringte siam tu an nih thu a sawi bawk.

Vawiina nungcha humhalh hapta puala inkhawmah hian nungcha humhalh kawnga thuziak, lemziak leh thlalak inelna buatsaiha a tit ha zualte hnenah lawmman hlan a ni bawk.

Nungcha humhalhna hapta hi District hrang hrangah hman a ni a, zirna in hrang hranga zirlaite hnenah nungcha humhalh kawnga zirtirna pek an ni bawk.

<><><>

MPSC

Mizoram Public Service Commission chuan Mizoram Civil Services (Combined Competitive) Main Examination, 2024 atangin Question-Cum-Answer Booklet a hmang tan tawh dawn.

Question-Cum-Answer Booklet Sample hi Website-ah en theih a niin, a hman dan tur chungchangah Candidate hriattur pawimawh en theih tarlan a ni a, Mizoram Civil Services (Combined Competitive) Main Examination, 2024 hmachhawn tur te'n ngun taka kalphung pawimawh tarlan chhiar tur leh fimkhur taka zawhna chhang tura hriattir an ni.

Mizoram Public Service Commission thuchhuah chuan tun October-a MCS (Combined Competitive) Mains Exam ah negative marking kalpui rih loh ni se an ti bawk.

<><><>

IGP PRESS MEET

Mizoram Police IGP Pu Lalbiakthanga Khiangte in kum 2017-a Aizawl Falkland Venga hnam dang ruang phum laih chhuah chu a thattu an man tawh thu vawiin khan a sawi.

Mizoram Police IGP chuan vawiin khan a pisa ah thuthar thehdarhtute kawmin Aizawl Falkland Hebrai venga Pu Zairema in hnuai hnam dang ruang an lakchhuah chungchangah Aizawl Bawngkawn Police Station-ah thubuai ziah luh a ni a ti a, hemi chungchangah hian Mizoram Police te chuan hnuchhui chhonzawm zelin, ruang an laih chhuahna in luahtu Manik Das, Manoj tia koh Dumka District Jarkhand-a mi chu chhui zawmin amah ngei a ni tih finfiahna an nei a ti a, hun rei tak he case hi an bawhzui hnuah Jarkhand Dumka District police te puihna in Mizoram Police ten tualthattu Manik Das Manoj tia koh leh a nupui Anjali Devi te chu thu zawhfiah atan nimin October ni 2 khan Aizawl Bawngkawn Police station an thlenpui tih sawiin tual an thahna chhan chu chhui chian mek ani tih a sawi.

<><><>

MZP ON SCHOOL BAG

MZP Sub Headquarters Kawnpui chuan vawiin khan zirlai naupang bag rih zawng an enfiah a, Ministry of Education-in Policy on School Bag 2020 hmanga inkaihhraina a siam chu zirna In thenkhatah zawm a hlawh tawh lo tih hmuhchhuah niin, zirlai naupangte School Bag ah hi a rit hlawm hle tih hriat a ni.

MZP thuchhuah tarlan danin Zirlai naupang rih zawng atanga teha za-ah 10 aia rit School Bag ah tir loh tur tih a nih laiin Kawnpui School thenkhat endikna atangin zirlai naupangte School Bag chu a rit fal hle tih hmuh chhuah

a ni an ti a, a bik takin Private School ah School bag chu Kg 8 aia rit ak an awm tih a sawi.

Thuchhuah tarlan danin School Bag rih zawng tura inkaihhraina angin Class 1 atanga Class 5 inkarah Kg 2 leh gram 500 a pel lo tur tih ani an ti a, Class 6 leh 7-ah Kg 3 aia rit lo, Class 8-ah Kg 4 aia rit lo leh Class 9 leh 10-ah Kg 5 aia rit lo tur a ni tih chu dan awmsa ani tih sawiin Zirlai naupangten School Bag an ah rih lutuk avang hian kum khat pawh tling lova School Bag chhia a tam hle an ti a, Zirlai naupangte hriselna pawh nghawngin hnungzang na leh dar na nei an tam tih an sawi bawk.

MZP Sub-Hqrs. Kawnpui chuan Zirlai naupangten School Bag an ah rit lutuk loh nana hma la nghal turin Zirna In hrang hrang an ngen tih sawiin Sawrkar-in inkaihhraina a siam ang zawm turin an ngen tih an sawi a, sawrkar hnenah pawh thlen an tum tih an sawi bawk.

<><><>

HNAHSIN KÛT

Champhai Nature Conser-vancy huaihawtin Mizorama Hnahsin Kût hmasa ber chu vawiin khan Champhai phaizawlah bultan a ni a, October 18 thleng a aw h ang.

Kût hawna inkhawm hi Aui Garden, New Champhaiah neih niin Adviser to CM Pu TBC Lalvenchhunga chuan Khuallian niin Kut a hawng a, Zaninah opening concert a awm nghal dawn a ni.

Pu TBC Lalvenchhunga chuan Champhai District in Swadesh Darshan 2 hnuaiah leh sawrkar scheme hrang hrang ațangin hmasawna tak tak a hmuh a beiseiawm tih sawiin mipuite chu sawrkar hmalakna thlawp a, thawhpui thiam turin a ngen a. Champhai khawpui chu hmasawn mek anih avangin ruahmanna fel tak nen duat taka enkawl a pawimawh thu a sawi bawk.

Adviser to CM hian Hnahsin Kut zara mipui ten eizawna remchang an neih belh chu lawmawm a tih thu a sawi a. Champhai chu Mizoram buhzem ‘Rice Bowl of Mizoram’ tia chhal thin a ni a, buhfai kher ni lo Tourism kaltlanga Mizoram buhzem a nih chhoh theih a beisei thu a sawi bawk.

Hnahsin Kût neih chung hian phai zawlah thil hrang hrang buatsaih a ni dawn a, phai pheikawngpui naupang tuallenna hun nuam tak tak buatsaih a ni dawn a, Beram Tlangah paragliding buatsaih niin dawr leh Mizo thuam hrang hrang lei tur a awm dawn a ni.

October ni 5 hian Cycle rally, Tour de Champhai bakah thil hrang hrang buatsaih a ni dawn a, Zan lamah Aui Garden-ah Leikapui zan hman a ni dawn a, Hnahsin Kût kharna hi October 18 zanah Mualnuamah Arkaiden zan concert hmangin neih a ni dawn a ni.

Champhai Nature Conservancy chuan Hnahsin Kût chu chenna leilung mila khawsak thiam kawnga khualzin te hipna tura a buatsaih a ni an ti bawk.

<><><>

MANN KI BAAT 10 YEARS

Prime Minister Narendra Modia radio programme Mann Ki Baat chuan vawiin khan kum 10 a tling. Kum 2014 vawiin angah khan PM Modia chuan Akashvani-ah Mann Ki Baat programme hmasa ber hmangin mipuite hnenah a ngaihtuahna te a sawichhuak a. Kum 10 chungin he programme kaltlang hian

Prime Minister Modia hian vantlang, hnamzia, nungcha leh khawsakphungahte mi tamtak nun a khawih a. Ram mipuite nunah a tha zawngin nghawng tam tak a nei a ni. Mann Ki Baat programme hi Prime Minister leh khua leh tuite inpawhna hmanraw tha tak a ni chhonzawm zel a ni.

<><><>

PRESIDENT

President Draupadi Murmu-i chuan zirlaite chu na nungchang ti chhe thei thil laka inthiarfihlim turin a chah. Vawiina Udiapur-a MohanLal Sukhadia University Convocation a hmanpuinaah he thu hi sawiin Pi Murmu-i chuan nundan tha ber nunpui chu an hna thawh leh nungchangah lalut turin a fuih a. An nunphung kawng tinrengah rinawmna nunpui turin a chah bawk a ni.

Vawiin Convocation ah hian Rajasthan Governor Haribhau Bagde, Punjab Governor Gulab Chand Kataria leh Rajasthan Deputy Chief minister Prem Chand Bairwa te pawh an tel a ni.

<><><>

HARYANA

Haryana Assembly inthlan campaign chu vawiin tlai khan a tawp a. Inthlan thawhkhata neih tur niin Assembly member 90 te thlang turin naktip Inrinniah vote thlak a ni ang. Inthlan vote tla te hi Jammu & Kashmir nen a rualin tun thla ni 8 ah chhiar a ni ang. Vawiin campaign tawp ni ah party hrang hrangten theihtawp chhuahin beihpui an thlak a. Senior BJP leader leh Assam Chief Minister Himanta Biswa Sarma chuan Jan Ashirwad Rally ah thu a sawi a. Congress hruaitute chu laina induhsak leh eiruk chingah a puh a ni. Congress MP Deepender Hooda pawhin Kalka ah vawiin khan a camapaign a. BJP chu na taka beiin hna vang leh loneitute harsatna thlentuah a puh a ni.

<><><>